



In Gottes Namen faren wir,
 seiner Gnaden begeren mehr.
 Tu hilff uns allen Gottes Krafft,
 verleihe uns alzeit grosse macht.
 Kyrie eleeson.

Und das heilige Creutz
 werd uns alzeit nütze;
 Das Creutz, da Gott sein Marter an leidt,
 dasselbig sey unser freud.
 Kyrie eleeson.

Auch das heilige Grab,
 da Gott selbest inne lag
 Mit seinen fünf wunden also here,
 frölich faren wir daher,
 gen Jerusalem.
 Kyrie eleeson.

Kyrie eleeson, Christe eleeson,
 nu helffe uns der heilig Geist
 Und die werde Gottes stím,
 das wir frölich faren dahin.
 Kyrie eleeson.